

TESTAMENTU

A bois, alipintas, murinattas,
galanas gardaneras, rusinzolos,
conchinigheddos, incurbiajolas,
chi bolaes che pintu soberanu
cantande a galabera gosos d'oro
bos regalo sas mèndulas in frore
sas milli murichessas de Locoe
pro chi Deus bos diat a isumbru
sas notas d'un'eterna sinfonia.
Sa luna semper bella e grassiosa,
sos isteddos chi luchen in su chelu,
sas frinas ch'accasazan sa natura,
sas nues, cussas biancas chei su nibe,
chi fachen crescher s'erba,
las regalo a sas binzas de Marreri
e a custa bella, antica Baronia
iscutta chene dolu e chene prantu
dae sas milli chimeras de s'anneu.

Sas funtanas benittas de "Su Monte",
sos bellos ribizolos
chi curren chin amore e fantasia,
sas alapinnas durches de Gonare,
sos nuraches de tottu sa Sardinna,
sas domittas de janas, sos pinnettos,
sun pro bois, alligros craparjeddos,
ca m'hazes semper dau sos alentos
chi m'han alluttu s'anima
peri cando su mundu fit ghelau
d'irbirgos, de malissias e d'ispramu.

A sos crios iscurtos, miserinos,
chi patin frittu e gana e cada anneu,
lis regalo sos nuscos de su coro,
sa luche 'e su manzanu
ei sos rajos serenos de su sole
ch'ingroghin sas ispicas,
ch'ingrassan sos bitellos
e chi moghen sos battimos d'amore
in custa bida arcana, semper bella
ca juchet durche s'alidu
de sa prus cara, eterna melodia.

TESTAMENTO

*A voi, fringuelli, zigoli, / graziosi cardellini, usignoli, / cinciallegre, allodole, /
che volate felicemente / cantando le lodi al Signore / con note d'immortale
fantasia, / regalo i mandorli in fiore, / i mille gelsi di Locoe / affinché Dio vi dia
le note infinite / d'un'eterna sinfonia.*

*La luna sempre bella e leggiadra, / le stelle che brillano nel cielo, / le brezze
che accarezzano la natura, / le nuvole bianche come la neve / che fanno
crescere l'erba, / le regalo alle vigne di Marreri / e alla nostra antica Baronia
/ sempre sconvolta senza pietà / dalle mille sventure del tempo.*

*Le fonti benedette dell'Ortobene, / i ruscelli che corrono con amore / i dolci rifugi
di Gonare, / i nuraghi di tutta l'isola, / le "domos de janas", le capanne, / sono
per voi, giovani caprari, / perché mi avete sempre dato la forza / che mi ha
inebriato lo spirito / per "cantare" anche quando / la mia anima era triste e
sconsolata.*

*Ai miseri fanciulli scalzi / che soffrono il freddo e la fame / regalo i profumi del
mio cuore, / la luce dell'alba / e i raggi sereni del sole / che maturano le spighe
di grano, / che fanno ingrassare i vitelli / e che alimentano la vita / in questo
mondo misterioso, / perché ha l'alito / della più cara ed eterna melodia.*